



Martinus natus est Friburgi Brisgauriæ Anno Christi millesimo quingentesimo duodecimo. Ibi cum foelici ingenio esset præditus, operam literis dedit, atque artium fundamenta foeliciter didicit. Inde Selestadtum peruenit, atque in ea ciuitate Iohannitarum ordinem suscepit. In eo loco cū diu summa animi moderatione uixisset, ædis Iohannitarum Argentinæ Commendator electus est. Eam functionem is præclare subiuit, atq; cunctis acceptissimus extitit. Erant tum, iuxta Bercken oppidum Alsatia, antiquæ Templariorum ruinae (qui olim in ijs locis unâ cum sacello excisi erant) uerùm amœnæ & frugiferae. Locus autem ad Commendatorem spectabat. Nam Templariorum bona Iohannitis atque ordini Theutonico cesserant. In eo loco Martinus pulcherrimum templum à fundamentis excitauit, atque loca circumiacentia pulchris ædificijs, & ad inhabitandum aptis, decorauit. In eo quoque nouo templo sibi sepulchrum elegit. Cum hoc modo per plures annos ijs in locis præuisset, tandem anno ætatis quinquagesimo, salutis uerò millesimo quingentesimo sexagesimo secundo obiit, atq; in ædificata æde primus hominum sepultus quiescit. Anon.